

BASES DA III EDICIÓN DOS PREMIOS SOFÍA NOVOA ORTIZ Á INCLUSIÓN DA PERSPECTIVA DE XÉNERO NOS TRABALLOS DE FIN DE GRAO E FIN DE MÁSTER

A promoción da igualdade real e efectiva entre mulleres e homes é unha das principais liñas de actuación da Deputación de Pontevedra, por iso, un ano máis, potencia a realización de traballos de fin de grao e de fin de máster nos que se integre a perspectiva de xénero.

Consciente da importancia da investigación e do estudo do significado e do alcance da igualdade entre mulleres e homes, que redunda en beneficio do progreso e do benestar do conxunto da sociedade, convócase a terceira edición dos Premios Sofía Novoa Ortiz á Inclusión da Perspectiva de Xénero nos Traballos de Fin de Grao e Fin de Máster, que se rexerán polas seguintes bases:

1. Obxecto

Fomentar, consolidar e dar a coñecer a inclusión da perspectiva de xénero nos traballos de fin de máster e fin de grao realizados na Universidade de Vigo, nos campus de Vigo e de Pontevedra.

2. Persoas beneficiarias

A convocatoria está dirixida a todo o alumnado da Universidade de Vigo pertencente aos campus de Pontevedra e de Vigo, que poderá acceder con calquera traballo de fin de grao ou de fin de máster no que se incluíse a perspectiva de xénero e fose presentado, defendido e aprobado durante o curso 2017-2018 en calquera rama de coñecemento.

3. Premios

Haberá 3 premios en cada categoría:

- Premios aos traballos de fin de grao:
 - Dous premios dotados con 1.000 € cada un
 - Un accésit dotado con 600 €
- Premios aos traballos de fin de máster:
 - Dous premios dotados con 1.000 € cada un
 - Un accésit dotado con 600 €

Os premios estarán suxeitos á retención do IRPF correspondente segundo a lexislación vixente no momento da resolución.

O aboamento dos premios efectuarase mediante un ingreso directo na conta bancaria da que sexa titular a persoa beneficiaria.

A contía consignada para estes premios imputaráselle á aplicación orzamentaria 18/250.2315.480.02 do Orzamento ordinario do organismo provincial.

O xurado reservará o dereito a declarar deserto calquera dos premios ou accésits.

4. Presentación de solicitudes

Co fin de garantir o anonimato do traballo, a documentación presentarase segundo o procedemento que se indica:

1. Presentación de solicitudes mediante formulario web: será necesario preinscribirse a través de www.depo.es, para o que se seguirán estes pasos:

- Cubrir os datos no modelo oficial de solicitude na páxina web e premer o botón "Enviar".
- Tras realizar o envío, descargar e imprimir o xustificante electrónico xerado pola web. Este incluirá un código único de preinscripción.
- O xustificante electrónico xerado durante o proceso de preinscripción presentarase, debidamente asinado, preferiblemente por medios electrónicos a través do modelo "Instancia xenérica" dispoñible na sede electrónica da Deputación de Pontevedra en <https://sede.depo.gal> ou presencialmente en calquera dos lugares e rexistros establecidos na normativa reguladora do procedemento administrativo común.

Xunto co xustificante electrónico deberase presentar unha fotocopia do DNI, un certificado da conta bancaria e a certificación académica correspondente, coa data de presentación do traballo e a cualificación obtida.

- Unha vez recibida a solicitude no Rexistro da Deputación activarase un código de inscrición que permitirá a recepción do traballo por vía electrónica. A persoa solicitante recibirá no seu telefono móbil unha mensaxe SMS na que se lle indicará a activación do código web asignado ao seu traballo.
2. Entrega do traballo por vía telemática: tras a recepción do código web comezará o proceso de entrega do traballo, que deberá presentarse nun ficheiro en formato PDF. A primeira parte do documento será un resumo de 500 palabras do traballo que se presenta. Este documento non deberá conter ningún elemento identificativo sobre a súa autoría ou titoría.

Unha vez recibido o traballo por vía telemática a persoa solicitante recibirá no seu correo electrónico a confirmación de que o proceso se realizou correctamente xunto cunha copia do documento rexistrado.

O Servizo de Novas Tecnoloxías da Deputación custodiará o emparellamento do código de inscrición e o código web ata que se coñeza o ditame do xurado, momento no que se realizará o dobre emparellamento dos códigos e se coñecerá a autoría dos traballos premiados.

A presentación de solicitudes farase a partir do día seguinte ao da publicación das bases desta convocatoria no *Boletín Oficial da Provincia de Pontevedra* (BOPPO). O prazo de presentación finaliza o **9 de novembro de 2018** e a data límite para a entrega dos traballos por vía telemática é o **16 de novembro de 2018**.

Se a documentación achegada estivese incompleta ou presentase erros rectificables (indicados na convocatoria) requiriráselle á persoa autora do traballo que, no prazo de dez días hábiles, complete a documentación ou corrixa as deficiencias; en caso de non facelo desestimarase a súa solicitude.

As persoas participantes garantirán que os traballos e os contidos presentados son orixinais e non infrinxen dereitos de terceiras persoas e serán responsables das infraccións que poidan causar neste sentido.

Non poderán presentarse aqueles traballos que fosen premiados noutras convocatorias ou concursos. Se se presenta o mesmo traballo a convocatorias simultáneas e este resulta

premiado a persoa adxudicataria deberá manifestar a renuncia expresa e formal se acepta outro premio.

5. Procedemento, xurado e resolución

Os traballos gañadores serán seleccionados por un xurado, nomeado para estes efectos por Resolución presidencial, que estará composto por:

- A presidenta da Deputación ou a persoa en quen delegue
- A deputada delegada de Igualdade ou a persoa en quen delegue
- Unha técnica do Servizo de Igualdade
- Dúas persoas pertencentes ao persoal docente e investigador (PDI) da Universidade de Vigo
- Unha secretaria: a xefa do Servizo de Igualdade

O xurado analizará os traballos presentados e valoraraos tendo en conta os seguintes criterios:

- Calidade do traballo presentado (de 0 a 30 puntos)
- Relevancia e carácter innovador da súa temática e metodoloxía (de 0 a 20 puntos)
- Aplicabilidade práctica das achegas do estudo (de 0 a 15 puntos)
- Uso de linguaxe inclusiva (de 0 a 15 puntos)
- Uso da lingua galega (de 0 a 10 puntos)
- Referencias e fontes bibliográficas (de 0 a 10 puntos)

O xurado poderá contar coa presenza e a asistencia de persoas expertas nas diferentes áreas e solicitar tanta información adicional considere oportuna para a súa resolución.

O ditame do xurado será inapelable e poderase declarar deserto o premio no caso de que os traballos non reúnan a calidade suficiente. Este ditame comunicáraselle directamente á persoa gañadora e farase público en www.depo.gal. Os premios entregaranse nun acto institucional organizado pola Deputación.

As persoas que integren o xurado percibirán as indemnizacións correspondentes ás axudas de custo e desprazamentos pola asistencia ás xuntanzas das que exista acta. Estes gastos imputaranse con cargo á aplicación orzamentaria 18/250.2315.226.99.

A concesión do premio non implica a perda da propiedade intelectual. A Deputación de Pontevedra poderá publicar os traballos premiados, facendo constar sempre a autoría.

Un exemplar de cada traballo premiado quedará depositado na biblioteca da institución provincial.

6. Protección de datos

Os datos persoais obtidos neste procedemento serán obxecto de tratamento pola Deputación de Pontevedra, en calidade de órgano responsable, coa finalidade de xestionar este procedemento, verificar os datos e documentos que a persoa interesada declare na súa solicitude para comprobar a exactitude destes e levar a cabo todas as actuacións administrativas que, no seu caso, se deriven.

A lexitimación para o tratamento dos datos baséase no cumprimento dunha tarefa en interese público ou o exercicio de poderes públicos segundo as normas de rango legal recollidas no apartado “Normativa aplicable” dispoñible na ficha do procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia.

As persoas interesadas poderán acceder, rectificar e suprimir os seus datos, así como exercitar outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.

A participación na convocatoria implica a aceptación destas bases.